



Naalakkersuisunut Siulittaasup ammaanermi oqalugiaata tunngavigalugu ammaanermi oqallinneq.
(Naalakkersuisut Siulittaasuat)

Sukkaannaq una qinersivik naajartorparput, taassumalu kingunerissallugu, innuttaasut kingusinnerpaamik april 2025 nutaanik Inatsisartunik qinersereersimanissaat.

Demokraatini paasisinnaavarput, Naalakkersuisut siulittaasuata kissaatigigaa sapinggisamik kingusinnerpaamik qinersinissap suaarutiginnissaa. Eqqarsarpunga, una neriutaasoq, taassuma pinginnerani pitsaasunik angusaqarusunneq. Tamannami pisariaqarluinnarmat.

Maannakkummi Naalakkersuisuusuni ajornartorsiut annerpaaq unaammat, pitsaanngitsunik angusaqarsimaneq, tamannalumi hurraartuutissaanngilaq.

Angusat pitsaanngitsut oqaatigeriikkattut amerlasimaqaat, isumaqanngilarlu maani tamaasa taakkartornissaat, taamaattumik annikittuinnaat uani erseqqissaatigissavakka, ukiut kingulliup iluani pilersinneqarsimasut. Taakkuli naammaginangerujupput toqqaannartumillu nunatsinnut ajoqutaasussaallutik.

Angusaq ajortoq siullem – Peqqinnissaq pillugu isumaqatigiissut

Decembarimi 2023 peqqinnissaq pillugu isumaqatigiissuteqartoqarpoq, ajornartorsiutini ajornerpaanik aaqqiissutaanngitsumik, peqqinnissaqarfimmi ajornartorsiutaasunik. Ajornartorsiut ajornerpaaq unaavoq, isumaqatigiissuteqarneq mattusiinerinnaammat. Aningaasanik ikippallaanik immikkoortitsisoqarsimavoq Peqqinnissaqarfimmi unammillernartut aaqqinneqarnissaannut maannakkorluinnaq pingaartumillu siunissaq ungasinnerusoq eqqarsaatigalugu. Minnerunngitsumik, sulisussarsiornermut sulisullu tigummiinnarnissaannut tunngatillugu, ajornartorsiutimmi taakkununga tunngasut qanoq aaqqiissuteqarfigineqarnissaannut isumassarsisoqarsimanngimmat.

Uagutsinnut Demokraatini pingaaruteqarluinnarpoq, inuttut qulakkeersimaneqassasoq, pitsaasumik peqqinnissaqarfeqarnissaq ikiuunnissamut piareersimasumik, napparsimalissagutta ajutuussaguttaluunniit. Ullumikkut taamaanngilluinnarpoq tamatigut ajoraluartumik, tamannalu aaqqiivigineqartariaqarpoq.

Uani inissisimavugut, naatsorsuutigisariaqarlugu peqqinnissaqarfiup suli tatisimaneqarnerulernissaa, utoqqaat amerligaluttuinnarnerata malitsigisaanik, aammalu inooriaatsimit aallaaveqartumik nappaatit amerligaluttuinnarnerisa kingunerisaanik aammalu meeqqat inuusuttullu amerligaluttuinnartut nappaateqarnerat suussusersineqartalerata. Taakkua Peqqinnissaqarfimmut ilungersornerulersitsererput ukiunilu tulliuttuni suli annertunerulertussaallutik. Tamanna siunissamut ungasinnerusumut pilersaarusionsormik pisariaqartitsivoq aningaasanillu amerlanerusunik



pisariaqartitsilluni.

Taamaakkaluartoq aningaasanik naammattunik immikkoortitsisoqarsimanngilaq, peqqinnissaqarfiup naammattumik pitsanngorsaatisaanik. Naalakkersuisut aningaasat amerlaneruneraraluaaalluunniit, kusassarniaannarlugit. Soorlu assersuutigalugu 2025-imut aningaasanut inatsisissatut siunnersuutip saqqummiunneqarneranut atatillugu tulluusimaarluni nalunaarutigineqarmat, 74,7 millioner koruunit aningaasaliissutit saniatigut tapiissutigineqartut peqqinnissaqarfimmut. Puigorneqarporli oqaatigissallugu, ukiunut sisamanut atuuttussaasut. Aamma puigorneqarpoq oqaluttuarissallugu, 30 millionit toqqaannartumik SANA-mut aningaasaliissutaasut. Puigorneqarpoq oqaatigissallugu, 8,7 millioner koruunit ukiumut meerartaarsinnaanngitsut ikiorserneranut. Taakku taakkartorneqartut soorunami pitsaasuupput, Pitsaasorujussuuartullu taaneqarsinnaallutik. Kisiannili tassa aningaasat nungoreerput, naatsumik nassuitsumillu oqaatigalugu isumaqarluni, peqqinnissamut suliniuteqarnek siunnerfeqanngippallaaqaq annikipallaarlunilu.

Ajoraluartumik peqqinnissaqarfimmi sulisutsinnut pikkorissunut tuppoq, innuttaasut pakatsinerannik tusarnaartuusariaqartartunut. Tamanna tulluannigilaq. Innuttaasut peqqinnissaqarfiup inissisimaneranut kamannerat eqqortumik Naalakkersuisunut tutsinneqartussaagaluarpoq. Sulisut sapinngisartik tamaat iliuuseqartarput sinaakkutit ajornartut iluanni. Taakkununga sulisunut qamanngavik qujassuteqarnera ingerlateqqikkusuppara.

Angusaq apeqquernartoq tullia – Akileraartarnermik aaqqissusseqqiineq

Ukioq manna martsimi Naalakkersuisut oqaluttuarsinnaasimapput, tunuliaquttatik peqatigalugit akileraartarnermik aaqqissusseqqiineq angusimallugu. Taamaaliornermut takussutissaalluarpoq, partiit Naalakkersuisuniittut kisimik, aaqqissusseqqiinermik taaneqarsimasumik kisimik atsiorusussimmamata. Eqqortoq unaavoq, aaqqissusseqqiineq akileraarutitigut appaanermik taaneqarsinnaasunik imaqanngimmat. Killormulli toqqarneqarsimavoq inummut ilanngaasut sulinermilu ilanngaasut qaffanneqassasut, taakkuinnaallu eqqartoraanni suliniutit pitsaasuullutik. Taamaattorli tamakkiisumik aningaasalersorneqarnissaa isumaqatigiissutiginiissaa isumannaarniarunnarlugu, aningaasanik inatsisitigut sinneqartoorutiniik isumannaarniarneqarsimalluni. Tunngaviatigut tamanna ajunngilaq, kisiannili oqippallaamik aarlerinarsinnaasumillu aaqqiinerulluni, taamaaliornikkut siunissami isertitarisassat apeqqutaasussaammata. Ingasattumik oqaatigissagaanni akiligassaq tullissatsinnut ingerlateqqiinnartussanngorlugu. Suleriaaseq taamaattoq pitsaanngitsuvoq, qularnanngittumillu toqqarneqarsimalluni, IA aamma Siumut kissaatigimmassuk qinersisoqanngitsiarnerani tunissutissanik tuniorarusummata. Akerlianik kissaatigineqarluni nuannarineqanngitsunik aalajangiinaveersaarnissaq. Tamanna ersarilluinnartumik iluareqqusaarneruvoq, qinersisartunit paasineqassaqaartoq.

Angusaq apeqquernartoq pingajuat – Aalisarnek pillugu inatsit

Massakkumut kingullertut eqqaaniagara tassaavoq aalisarnek pillugu inatsit, upernaq IA-mit Siumumiillu akuersissutigineqartoq. Tamattami ilisimavarput, aalisarnek pingaarnarpaatut inuussutissarsiutigigatsigu. Aalisarnermimi, avammut tunisassiornek annerpaaq ingerlakkatsigu aammalu tassani nunatut aningaasanik amerlanerpaanik isertitsissutigisarlugi. Aalisarnermimi aamma imaammat, inuppassuit



aningaasarsiuutigimmassuk. Taamaattumik aalisarnej tamatsinnut pingaaruteqartorujorujussuuvoq. Tassunga atatillugu aalisartorpassuagut nunatsinnut suliniarnerannut qutsavigerusuppakka. Sila qanoq ikkaluarpalluunniit atukkallu qanoq ikkaluarpata aalisarlutillu sulerulupput. Taamaammat ataqqinnittorujussuuvunga.

Aalisarnej pillugu inatsisip nutaap akuersissutigineratigut Naalakkersuisut, IA aamma Siumut tassanngaannaq aalisarnermi suliffissuaatillit sanngiillissimavaat, aalisartunut siunissaq nalorninarterlugu, aalisarnermi suliffissaq ikilisarlugit aammalu ataatsimut isigalugu inuiaqatigiit aningaasarsiornerat innarlarsimallugu. Allatut oqaatigineqarsinnaangilaq, tassami tamanna maani nunatsinni siunissami aningaasarsiornitsinnut isumalerujussuimmat. Aalisarnej pillugu inatsit nutaaq ima isumaqarpoq, aningaasanik ikinnernik isertissasugut naatsorsuutigisaraluatsinnit. Tamanna kalaallit ataasiakkaat aningaasaqarniarnerannut pitsaanngitsuuvoq, ataatsimullu aningaasaateqarnitsinnut inuunerissaarnissaraluatsinnullu pitsaanngitsuulluni aammalu aningaasatigut namminiilivinnissatsinnik suliniuteqarnitsinnut pitsaanngitsuulluni aningaasatigullu namminiilerutta politikikkut namminiilernissatsinnut pitsaanngitsuulluni. Tamanna uagut Demokraatini paasisinnaangilluinnarparput.

Kingulissatta eqqaamassavaat, IA aamma Siumut immikkut ilisimasalinnut, sulisunut, aalisartunut, aalisartut kattuffiit, aalisarnermik ingerlatsivinnut uagutsinnullu illuatungiliuttunut tusaajumasimangitsut. Kingulissatta eqqaamassavaat, IA aamma Siumut aalisarnej pillugu inatsimmik nutaamik akuersisimasut naak kingunissaannik pitsaanngitsunik taassanngiusattunik mianersoqqusisoqaraluartoq.

Oqaatigineqareersutut Naalakkersuisunut isorinnissutissat amerlangaluaqaat. Neriorsuereeramali piffissaq tamaat taakkununga atussanngilara. Taamaattorli oqaaseqarsinnaatitaanerma sinnera atorlugu ersarissumik oqaluttuarissavara, Demokraatit suna kissaatigineeraat tamatsinnut inuiaqatigiinnik pitsaanerunuk pilersitsinissamat.

Sanngiinnerit salliutinneqartuassapput

Inuit pisariaqartitsinerpaat, ikiorneqarnissaat salliutittuassavarput. Amerlanertigut tassaapput inuit namminneq aqussinnaangisaminnik pisuussutiginnngisaminillu inissisimalersimasut. Assersuutissatsialaapput meeqqat sumiginnakkat, innarluutillit, napparsimasut, atornerluisut, angerlarsimaffeqaqngitsut utoqqaallu soraarnerussutisiaminnik ileqqaagaqanngitsut.

Ullumikkut inuiaqatigiit aqqjissuussaanerat imaappoq, tamatta arlalinnik pisinnaatitaaffeqarluta. Soorlu suliffissaaleqinermi pisortanit ikiorneqarnissamat pisinnaatitaaffeqarneq, llinniagaqarnersiuteqarneq, utoqqalinersiuteqarneq- aamma siusinaartumik pensionisiaqarneq aammalu akeqaqngitsumik nakorsiarinnaaneq. Pisinnaatitaaffiit pitsaasut pingaarutillillu.

Pitsaasumilli iliorusungaratta, soorlu puigorsimagipput pingaarnersiuisalluta, kikkut inuiaqatigiinnit ikiorneqarnissaminnik pisariaqartitsinerpaanersut. Sanngiinnerpaat salliutinnissaat puigorsimavarput. Taakku inuit namminneerlutik annerusumik iliuseqarnissaminnik periarfissaqanngitsut.



Demokraatit assersuutigalugu isumaqarput, inuit sulisinnaagaluit ikiorneqarpallaartut. Sulerusuttunut suliffissaqarluarpoq. Taamaattorli angerlarsimaannarluni pisortat ikiorsiissutaannik tigooraanissaq pilerinarpallaartunngortissimavarput.

Siunissami annertunerusumik ikiorsiinerput suliniuteqarnerpullu toraagarinerusariaqarparput inuiaqatigiinni, ikiortariaqarnerpaanut aammalu nammineq pisuussutiginnngisaminnik taamatut inissisimalersimasunut.

Namineerluta nunagisatsinni pissaanermik tigusinissamut sapiissuseqartariaqarpugut

Demokraatit kissaatigaat, uagut kalaallit namineq nunatsinni pissaaneq tigussagipput. Iluaqutaanngilaq, Danmarkimi nunanilu allani pissutsinik naassaangitsumik issuaaginnarnerput. Inuiaat immikkuullarissuuvugut, nunami immikkuullarissumi najugaqartut, allanut nunanut assersuunneqarsinnaangitsumi inissisimanerput najugaqariaaserpullu pissutigalugit.

Taamaattumi namineerluta aaqqiissuutissanik nassaarsiortariaqarpugut. Annertuunik allannguisariaqarpugut, uagutsinnut inuiaqatigiinnut kalaallinut tulluussakkamik. Inuiaat pisorta qarfissuarmik peqarnissamik kissaateqartuunngilagut, ulluinnarni inuunitsinni sumininnguanut allaat aalajangiisartussamik. Ileqqorinngilarput, pappiararsornerujussuaq aqqusaaqqaarlugu sumininnguanik angusaqarnissaq. Inuiaagatta, pissutsit ajunngitsumik ingerlappata naammaginnittut aammalu nammineq inuunitsinnut annerpaamik aalajangersinnaasuseqarusuttut. Taamaattumik namineerluta nunatsinni pissaaneq tigusariaqarparput inuiaqatigiinnillu sanarfilluta, eqqarsartaaserput namineerluta kulturperput aallaavigalugit.

Kalaaliulluni akikinnerulertariaqarpoq

Demokraatit inuiaqatigiinni aningaasaqarniarnermi anguniagaasa pingaarnarpaartaraat, Kalaallit Nunaanni inuuniarneq, najugaqarneq aammalu suliffeqarfinnik ingerlatsineq akikinnerussasut. Tamanna anguneqassaaq aningaasatigut isumannangitsumik imatut, tunngaviusumik inuunerissaarnerup pitsanngorsarnissaanut aammalu inuiaqatigiinni sanngiinnerpaat atugaasa pitsanngorsarnissaannut akissaqassalluta.

Taamaammat ataatsimiinnermi uani isertitanut akileraarutip ingerlatseqatigiiffinnillu akileraarutip appartinneqarnissaanik siunnersuuteqarpugut. Innuttaasut, aallarnisaasut suliffeqarfiillu pitsaanerusumik atugassaqartittariaqarpagut, nunarput siumut ingerlaleqqullugu aammalu siuariartuleqqullugu, pisuunerulersilluta inuunerissaarnerulersillutalu.

Tassunga atatillugu namminersorlutik inuussutissarsiuteqartut sinaakkutai qimerloortariaqarpagut. Pisariinnerullunilu allaffissorpallaannginnerussaaq maani nunatsinni suliffeqarfimmik ingerlatsineq. Suliffeqarfiit namminersortut tassaassapput, ineriartornermik siuarsaasut pisuunerulernissamut inuunerissaarnerulernissamullu ingerlatsisut. Tassanilu pisortat pimoorussamik suleqataassapput unammillertaanatik.



Timersorneq kulturilu ataatsimoornermik ataqatigiinnermillu pilersitsisarpoq

Inuttut uummarissarneqarnissamik, nuannaartinneqarnissamik aliikkusersorneqarnissamillu pisariaqartisarpoq. Tassanilu timersorneq kulturilu neqeroouterpassuarni, peqataaffigutsigit imaluunniit isiginnaartuinnarusukkutta, pingaartumik inissisimapput. Qularutissaanngilaq, nunarsuatsinni pingaarutillit annertuumik neqeroorutissaqartut. Soorlu tv-kkut Premier League, Netflix filmerniaraangatta aammalu Spotify nipilersukkanik tusarnaarniaraangatta. Aammali pingaaruteqarluinnarpoq, politikikkut nunatsinni neqeroorutaasut tapersersornissaat.

Qulakkiissavarput, kalaallit nipilersugaannik nutaanik pilersitsisoqartuarnissaa, isiginnaagassioortartut kalaallit atugarissaartinnissaat, qalipaasartut kusanartuliortartullu suliaminnut aningaasanik qinnuteqarsinnaanissaat, atuagassianik kalaallisuunik amerlanernik pilersitsisoqarnissaa aammalu meeqqat, inuusuttut uagullu allat tamatta timersornissamut timigissarnissamullu pitsaasunik periarfissaqarnissarput.

Tassunga atatillugu pingaartuuvoq uagutsinnut Demokraatini, politikikkut timersornermut aningaasaliissutit amerlineqarnissaat. Timersorneq nunatsinni ataatsimuulersitsisarpoq, inuusuttut nuannaartorisaaqalersittarpaat aammalu qularutissaanngitsumik inuit amerlanerusut – pingaartumik meeqqat inuusuttullu – timigissarnissamik aallartitsittarlugit, tamannalu qularutissaanngitsumik pisaasuuvoq. Taamaaliornikkut timersornermut aningaasaliissutit qaffannerisigit innuttaasut peqqissusaannut pitsaasumik kinguneqartitsissalluni.

Taakkulu saniatigut takunngitsoorneqakkajupput, timersorerup tunniuttagai, suliffeqarfinni pisariaqartinneqartut. Anguniagaqarneq ilikkarneqartarpoq anguniakkallu anguniarneranni toraagalimmik sungiusartoqartarluni. Imminut piumaffigisinnaanerup pingaassusa ilinniarneqartarpoq. Imaammammi, pitsanngorusukkaanni sungiusarnissaq ukkatarinninnissarlu pisariaqarmata. Piginnaasat taakku suliffeqarfinni pisariaqartippagut, atuakkanillumi atuaannarluni ilikkarneqarsinnaanngillat. Timersornerulli taakku pingaaruteqarluinnartut tunniussinnaavai.

Ilinniarneq sunut tamanut tunngavissaavoq

Inuiaqatigiinni ilinniagaqassuseq siuarsartuarneqassaaq. Ingerlaavartunik annertuumik aningaasaliiffigisariaqarpoq. Meeqqat tamarmik minnerpaamik Meeqqat atuarfianni inaarutaasumik misilitsinnermik angusisimassapput, sapinngisamillu innuttaasut amerlanerpaat inuussutissarsiutigisinnaasaminnik ilinniagaqarsimassallutik. Atuagarsornikkut ilinniarnerruppat imaluunniit inuussutissarsiutinut ilinniarnerrupata uunga atatillugu pingaaruteqarpallaanngilaq. Pingaaruteqartuuvorli, inuup ilinniarnissani qinerpagu, pitsaanerpaamik piginnaasani atorlugit, tamannami inummut ataasiakkaamut inuiaqatigiinnullu pingaarnepaammat.

Ilinniartitaaneq nunarsuarmi pingaarutilimmik inissisimalernissatsinnut sakkussat annerpaartariuassavaat, nunarsuarmi ilinniarluarsimasut ikaligaluttuinnarneranni nunarsuarmiooqataanerullu annertusigaluttuinnarnerani. Ilinniagaqarnerlu aammattaaq inuunerissaarnissatsinnut toqqammaviusaaq, pingaarnepaanullu ilaalluni naalagaaffinngorluta ilusilersuinissatsinnut. Ilinniarnermi aqutigalugu, tunngaviusunik ilisimasaqalersaratta kingusinnerusukkut immikkut ilisimasariligassatsinnik.



Ilinniarnikkummiuna qaammarsaanikkullu, inuiaqatigiit tunngaviat paasilersaripput. Aammalu ilinniarnikkut qaammarsaanikkullu nunarsuarmut ammanerulernissatsinnut ilisimasaniq piginnaasanillu pissarsisartugut.

Taamaammat اساسارا ilinniartuq aammalu ataqqinartut inuusuttut; tupinnaannartumik pingaaruteqartuuvusi siunissatsinnut. Ilissimi pikkorissutsissi eqiasuinnissilu, nunarput اساسارput ineriartorteqqissammagu. Taamaattumik suliniarnissinnut qutsavigerusuppassi kajumissaarlusilu sulii sukataaqqullusi ilinniakkassi naammassinissaanut. Tassa pitsaanerpaamik iliuuserisinnaasarsi tamatsinnut aammalu inuiaqatigiinni ataqatigiinnissatsinnut. Aammalu pitsaanerpaamik iliuuserisinnaasarsi pitsaanerpaamik inuuneqarnissassinnut siunissami.

Peqqinnissaqarfimmi sulisoqarnerup ukkatarineqarnera

Naggataatigut peqqinnissaqarfik eqqartorusuppara. Eqqaamassagunarparsi uuma ammaanersiornerup aallartinnerani Naalakkersuisut peqqissutsimut politikkiat isornartittorjuugiga. Taamaattumik tunngaviumik oqaluttuarerusuppara, qanoq uagut Demokraatiiniit kissaatigineripput, iliuuseqarnissaq ingerlatamut taama pingaaruteqartigisumut.

Unammillernartuq annertooujussuaq nunatsinni inissisimaffigisarput unaavoq, peqqinnissaqarfimmut killissaa tikillugu ilungersortorujussuummat. Qanorissuamitaavami, ukiuni tulluuttuni ilungersorneq sulii annertunerulerpat?

Ajornartorsiutip annerpaartaa tassaavoq sulisussaqaarniarneq. Peqqinnissaqarfimmi suunngilaq ilinniartuorsimasunik pitsaasunillu sulisoqanngikkuni. Sulisunuku, napparsimasunik isumaginnittuusut. Sulisussarsiornerli sulisullu pigiinnarnissaat unammillernartipparput. Patsisaasut amerlaqaat soorlu assersuutigalugu, Danmarkimi sulisussanik amigaateqarneq, tassangaanniimmi pingaarnerpaamik sulisussanik pissarsisaratta. Iluqaataannngilarli, uatsinnut naalleraatissagutta. Uani soorlu eqqarsaatigaara inissisimaneq avaangunartuq, Naalakkersuisut sulisunut inissianut sianiilliornerata kingunerisaanik, sulisut pitsaasut Peqqinnissaqarfimmi atorfirminnit tunuartariaqarsimmamata.

Amigaatigaarput, tamatta ataatsimoorluta nassuerutigisariaqaleratsigu, Peqqinnissaqarfimmi ajornartorsiutit annerpaartarigaat sulisussarsiorneq minnerunngitsumillu sulisut piginnaaneqarluartut tigummiinnarnissaat. Nassuerneq taanna ataatsimooruttariaqarparput, taassumalu kingorna pingaarnerisuisariaqarluta ajornartorsiummut qitiulluinnartumut. Peqqinnissaqarfimmi sulisuunik pilerinarsartariaqarparput, sulisunullu tamanut tunngavoq. Soorlu uku suliffimmi atugassarititaasut, akissarsiat aammalu siusinnerusukkut taaneqartoq inissaqaarniarneq misissortariaqarpagut. Maannakkut sulisuusut oqaloqatigisariaqarpagut annertunerusumik paasinnissinnaalerumalluta, qanoq ajornartorsiutit nalilernerat aammalu aaqqiissutissanik siunnersuutissaqarnersut.

Nunarsuarmi unammilleqatigiinnermut aamma isummersortariaqarpugut minnerunngitsumillu Danmarkimi suliniutigineqartunut, toqqaannartumik sulisussarsiorneq periarfissatsinnut innarliisunik. Tassanilu pingaaruteqarpoq tikkuassallugu, Danmarkimi kiisami nassuerutigineqarsimmammat, aamma tassani peqqinnissaqarfimmi sulisunik pisariaqartinneqartunik pissarsiniarneq ajornakusoortoq aammalu



maannakkut nakorsanut, peqqissaasunut aammalu isumaginninnermik- aamma peqqinnissamut assistentinit aatsaat taama annertutigisunik aningaasarsianik qaffaasoqartoq. Tamatta Peqqinnissaqarfimmi unammilligassat nutaamik isigilingikkutsigit, qanittumi aqqitassaannngitsuusamik ajornartorsiuteqalissaagut, innuttaasut ullumikkumiit sulii annertunerusumik paaqqineqarnermut, isumassorneqarnermut passunneqarnissamullu periarfissaarutissammata uffa amerlanerpaatut isumaqaraluarluta, pissusissamisuuginnartoq inuiaqatigiinni ingerlalluurtuni.

Aammalu; peqqinnissaqarfimmi unammillernartut sulisut pisuussutiginnilaat. Pisinnaasartik tamaat ilungersorlutik sulipput. Kamak pakatsinerlu Naalakkersuisunut politikkerinullu saatinneqartariaqarpoq. Sulisut peqqinnissaqarfimmi annertunerusumik kaammattorneqarlutillu qutsavigineqarnerusariaqarput tamatsinnit.

Inuiaqatigiit pitsaanerulernissaannut aningaasaliinissamut sapiissuseqartariaqarpugut

Naggataatigut naatumik eqikkaarusuppunga, nuna inuiaqatigiillu qanoq ittut pilersikkumallugit, Demokraatit uangalu ullut tamaasa sorsuutiginerigut.

Kissaatigaarput nunami inoorusulluta, kiffaangissusermik inuttullu akisussaassusermik ukkatarinniffiusumi. Nuna, kiffanngissuseqarluni suliniartunut nersorinnittoq aallarnisaasunullu pisariitsumik aallartinnissaannut periarfissiisoq. Nuna, innuttaasut suliffeqarfiillu, nammineerlutik akissarsiamik annertunersaannik tiggumminniinnarnissaminut periarfissinneqartunik, taamaalillutik aningaasaliinnaanngorlugit ineriartorsinnaanngorlugillu. Nunalu, ilinniarusussuseqarneq pissusissamisuuinnaartoq taamaaliornikkut ineriartornermut pilliuteqaqataajuarluni aningaasatigut namminiilivinnissap anguniarnerani.

Aammali taamatulli pingaaruteqartigaaq nunami inuuneq, sanngiinnerpaanik isumaginnittumi. Nuna, innarluutillit akuutinneqarlutik misigiffigisaat, innarluutilinnut tulluuttunik suliffissaqartitsisoq ajornanngitsumillu angalaarfissaqartoq. Nuna, utoqqaat suliniutaannik qujamasuffiusoq pitsaasumillu utoqqalinissaannik isumannaarisoq. Nuna, meeqqat arlaannaataluunnit atornerlunneqarnissaminik annilaangaffigisassarinnngisaa. Aammalu nuna, sunniuteqarluartumik ingerlalluurtumillu peqqinnissaqarfilik paaqqinninneq isumassuinerlu ukkataralugit.

Tamakku anguniarlugit, pilersaaruteqartariaqarpugut. Iliuseqartariaqarpugut. Amerlanerusunik aningaasarsiortariaqarpugut. Taakkununga pisariaqarpoq, sapiissuseqartumik aalajangiinissarput. Sapiissuseqarluta aningaasaliinissarput. Nuummi mittarfissuaq aqagunnguaq piariissaaq mittarfissuillu Ilulissani Qaqortumilu ukiuni tullerni aamma piariissapput. Taakku mittarfissuit sapiissuseqarluni annertuumik aningaasaliiffigineqarput. Pisariaqarsimallutillu.

Mittarfiit nunatta tikikkuminarneranut annertusaataassapput periarfissanillu annertuunik ammaassissallutik soorlu takornariartitsinerup inerisarneranut, aalisakkanik toqqaannaq avammut tunisassiornermut kiisalu aatsitassarsiornermi suliffissuit avataaneersut pilersaarnissaanut. Taakku tamarmik allarpasuillu kingunerissavaat, aningaasaqarnerup tamarmiusup pitsanngoriarnera, naggataatigut nunaqavissunut iluaqutaasussa q inuunerissaarnerulernermik pisuunerulernermillu. Taakku



tamarmik aningaasaliinissamut sapiissuseqarsimagatta naak nipituuliorlutik
naammagittaalliortoqaraluartoq annilaangasoqarlunilu politikkerinit partiinillu qaffasissunit.

Aningaasaliinissaq sapiissuseqarfigissavarput. Aalajangiinissaq sapiissuseqarfigissavarput.
Qiviimiataaginnarluta qaquguluunniit unittuussanngilagut. Taannalu immaqa aamma
ajornartorsiutaanerpaavoq, maannakkut Naalakkersuisuusuni. Nutaanik isumassarsiassaarupput.
Siunnersuutissaarupput.

Qaa qinersinissaq suaarutiginnaruk

Sunaluunniit sivitsorsarlugu pitsaasuunngisaannarpoq. Nalunngilara, Inatsisartunut qinersinissaq ukiut
tulliani pissasoq, isumaqarpungali, pingaaruteqartoq, piaarnerpaamik suaarutigineqarpat, inuit nutaat
nutaanik isumassarsiallit pissaanermut inissinniassammata. Naalakkersuisoqarpugut
unittoorluinnarsimasunik, silaannarlu salinneqartariaqarpoq qinersititsinikkut. Taamaattumik:

Asasara Naalakkersuit siulittaasuat, qinersinissaq suaarutiginiaruk. Ullumikkut aqaguunngitsoq.